

**АБДУЛЛА ОРИПОВ**

# **ШОИР ЮРАГИ**

**ТОШКЕНТ «МАЪНАВИЯТ» 2003**

Ўзбекистон Қаҳрамони, Халқ шоири Абдулла Ориповнинг ушбу тўпламдан асосан кейинги уч-турт йида ёзилган янги шеърлари урин олди. Атоқли шоирнинг буюк Истиқлолнинг ҳаётбахш неъматларидан руҳ олган турфа мавзулардаги гафаккур дурлари ўқувчиларга манзур бўлади деб ўйлаймиз.

4702620204-12  
0 M25/04/-03

©«Маънавият», 2003

## ШОИР ЮРАГИ

Ўтар бу кўприкдан жамики жонзот,  
Чумолидан тортиб филлар ҳам ўтар.  
Султонлар ўтади гоҳ шод, гоҳ ношод,  
Занжирларин судраб қуллар ҳам ўтар.

Элчиларга ўхшаб турфа замондан  
Шалок аравалар, “мерс”лар ўтади.  
Рўбарў келишиб икки томондан,  
Бир-бирига тамом терслар ўтади.

Суйишганлар ўтар суяб бир-бирин,  
Бузувчилар ўтар, ўтар усталар.  
Хушёрлар ўтади тежаб кўз қирин.  
Ўтади эмаклаб пиёнисталар.

Ўтиб бораётир ана жуфт гуруҳ,  
Бири шўҳ, бировин кўзларида нам.  
Етаклаб бормокда бирини шукуҳ,  
Бошқа бировини етаклаган ғам.

Олифталар ўтар – ғариб сийрати,  
Ботирлар ўтади – қалбида ўтлар.  
Бешиқлар ўтади – дунё зийнати,  
Ўтади лапанглаб, вазмин тобутлар.

Муттасил бу йўлда келади тўқнаш  
Нур билан зулумот, ўлим ва ҳаёт.  
Бу кўприк оламнинг ўзига ўхшаш,  
Бир фарқи – соҳиби ихтиёрсиз зот.

Кўприк остидаги жўш урган даре.  
Сув эмас – ўтганлар тахир кўз ёши.  
Ҳар нени кўтарган бир ўзи танҳо,  
Бор на таъмирчиси, на бир юкдоши.

Бу кўприк, бу кўприк қуласа агар,  
Не ҳислар қоларди сарсон-саргардон.  
Гарчи қисматида бор қанча хатар,  
Ҳар нечук барига у баюгардон...

*2000 йил, август*

## ЎЗБЕКИСТОН АСРИ

Етармизми юз йилликнинг охирига ҳам,  
Кўярмизми Янги аср пойига кадам.

У кунларни кўриш бизга насиб этгайми,  
Илтижомиз Яратганга бориб етгайми.

Кечагина яшардик шу хаёллар билан,  
Иштибоҳу ўйлар билан, саволлар билан.

Афсус, бунга етолмади қанча инсонлар,  
Қанча-қанча азиз зотлар, жаннати жонлар.

Раҳмат қилсин барчасини Аллоҳнинг ўзи,  
Чакнадими, бир кун сўнгай умр юлдузи.

Ёзган экан тирикларнинг пенюнасига,  
Бизлар етдик Янги аср остонасига.

Шукроналар айтсак оздир бу инъом учун,  
Шарафлайлик омад деган даҳонинг кучин.

Лекин ушбу остонага ким келди қандок?  
Ўтган йўлинг нечук бўлса, аъмол ҳам андок.

Кимдир келди бу маррага урушлар билан,  
Талотўплар, бир-бирини суришлар билан.

Кўзда ёши дарё-дарё халқлар келдилар,  
Етим-есир, насибаси талхлар келдилар.

Шоҳлар келди, бойлар келди, гадолар келди,  
Севишганлар – ишқ йўлида адолар келди.

Келди аср оғушига эртаси порлок,  
Бешигида қиқир-қиқир кулган чақалок.

Лекин менинг толеимга хавас қил, олам,  
Мен беназир бир хис билан ғолиб чиндап хам.

Неча асрий занжирларни тапладим узиб,  
Ҳақим еган ёвуз кучлар кетдилар тўзиб.

Бош устимдан ўтди канча тўфон, қасирға,  
Минг шукурки, озод етдим Янги асрга.

Ўзбекистон – она юртим, ота маконим,  
Шу беноён жаҳон ичра тенгсиз жаҳоним.

Янги даврон кошонаси ўзинг бўлгайсан,  
Иншооллоҳ, энди абад нурга тўлгайсан.

Ишончимнинг боиси бор баридан ортик,  
Аллоҳ сенга буюк хислат айламиш гортик:

Мехнат ҳам бор, шавкат ҳам бор, қарвон ҳам  
бордир.  
Дунё хавас айлагулик Сарбон ҳам бордир.

Фотиҳага қўл оч энди, бут бўлсин қаср.  
Ўзбекистон асри бўлгай шаксиз бу аср!

*2000 йил, январь*

## ЎЗБЕКМАН

Янги бир асрнинг остонаси бу,  
Етишим умримнинг қутлуғ ёшига.  
Тилимда шукрона, дилимда гулу,  
Тарих саркотибин келдим қошига:

Мана, мен ўзбекман, қўлимда туғим  
Ва барча аъмолим битилган китоб.  
Шунинг ичидадир борим ва йўғим,  
Шунинг ичидадир мен учун офтоб.

Ўзбекман, иншооллоҳ, иймоним бутун,  
Тилим қисик эмас башариятдан.  
Кимгадир тенгдирман, кимдандир устун,  
Зувалам корилган самимиятдан.

Ўзбекман, гоҳида иқболим кулиб,  
Гоҳида ўзимдан чикқан офатим.  
Дунёни олсам-да жаҳонгир бўлиб,  
Гўдак йиғисига йўқдир токатим.

Ўзбекман, қанчалик жафо чекмайин,  
Ўзимга ҳақ эдим, ўзимга ҳақман.  
Яшадим ёвларга бўйин эгмайин,  
Бугун ўз эркига эришган халқман.

Истиқлол, кетма юрт пешонасидан,  
Толе, тарк этмагин бизни илоҳим.  
Мана, янги аср остонасидан  
Ўтдим. Бисмиллоҳир Роҳмонир Роҳийм.

*2000 йил, декабрь*

## БУЮК КИТОБ

Табиатнинг чархи мангу,  
Баҳору ёз кишлаётир,  
Барчасидан инсон эзгу,  
Буюк китоб ишлаётир.  
Армон борми, орзу борми,  
Халқим дилга эшлаётир,  
Бизга аён дўстми – ёрми,  
Буюк китоб ишлаётир.

Сайлов бўлди, сийлов бўлди,  
Кимдир лабин тишлаётир,  
Лекин элнинг кўнгли тўлди,  
Буюк китоб ишлаётир.  
Ватан, сени қанча эллар  
Орзу эгиб тушлаётир,  
Ило бахтли бўлсин улар,  
Буюк китоб ишлаётир.

Ха, бу китоб ишлар мангу,  
Чунки ҳақни пешлаётир,  
Мисли Темур “тузуги” бу,  
Буюк китоб ишлаётир.  
Куксин кериб яйловларда  
Арғумоқлар кишнаётир,  
Уч жилолик яловларда  
Буюк китоб ишлаётир.

Ислом оға, қўлингизни  
Халқим яна ушлаётир,  
Аллоҳ берсин йўлингизни,  
Буюк китоб ишлаётир.  
Озод юртнинг метин сафин  
Жумла жаҳон хушлаётир,  
Қутлаб сиздек муаллифин,  
Буюк китоб ишлаётир.

*2000 йил, февраль*

### **БИР ҚАРАСАМ...**

Бир қарасам, дўсту ёрдан кўнглим тўкдай,  
Бир қарасам, атрофимда ҳеч ким йўкдай.

Бир қарасам, суянчиқдай болаларим,  
Бир қарасам, улар синиқ лолаларим.

Бир қарасам, бу дунёда бахтим бордай,  
Бир қарасам, буткул олам менга тордай.

Бир қарасам, муродимга етгандайман,  
Бир қарасам, кўзим очиқ кетгандайман.

Бир қарасам, шон-шуҳратга йўғрилганман,  
Бир қарасам, эндигина туғилганман.

*1998 йил, август*

\* \* \*

Дедилар: – Чакнаган қайси юрт эрур,  
Буюк Сохибкирон сочган зиёдан.  
Жавоб бердиларки: – Ҳеч сўнмас бу нур  
Таралган энг аввал Қашқадарёдан.  
Дедилар: – Қайси эл бедор доимо,  
Завқ олар меҳнатдан, сулув дунёдан.  
Жавоб бердиларки: – Шоир, уламо,  
Санъаткорлар чиққан Қашқадарёдан.  
Дедилар: – Жаҳонга буюк юртбоши  
Парвоз айлаганди қайси маъводан.  
Жавоб бердиларки: – Ҳурлик қуёши  
Балққанди даставвал Қашқадарёдан.  
Даставвал, даставвал Қашқадарёдан!

*1999 йил*

## ОЗОД РЕСПУБЛИКАМ

Айни чоғ, етти йил бундан мукаддам,  
Ижобат топганди асрий ниятим.  
Ўзингсан интилиб етишган Каъбам,  
Озод Республикам – Жумхуриятим!

Кадим боболарим ёдимга келгай,  
Сен ўзинг гурурим, сен – ҳамиятим.  
Сенинг канотингда авлодлар елгай,  
Озод Республикам – Жумхуриятим!

Уч минг йиллар аввал Зардуштий бўлиб  
Дунёга келгандинг сен – жамиятим.  
Қутлайман мен сени фахрга тўлиб,  
Озод Республикам – Жумхуриятим!

Етти ҳаж савобин топгум бегумон,  
Сени бир куйласам, эй Хурриятим!  
Ўзбекистон – юртим, Ватан жонажон,  
Озод Республикам – Жумхуриятим!

*1998 йил, август*

## ЙЎЛТЎСАР

Оқар сувга ўхшар Инсон умри ҳам,  
У ҳам ўтган жойин айлагай жаннат.  
Аммо ўзанидан заққум оққан дам  
Дўзах захри қолур ўрнида фақат.

Балки Сен билмассан, нимадир савоб,  
Балки яхшиликка бормаган кўлинг?  
Сенга ким амр этди, айлагил жавоб,  
Нечун ёвузликка бурилди йўлинг?

Боболар демишлар, ҳатто пашшага  
Бу ёруғ оламда бермагил озор.  
Наҳот зулм билан тўлсанг нашъага,  
Наҳотки сенинг ҳам Инсон номинг бор?

Ҳатто ўлимтиқлар эгаси – қузғун  
Меҳр билан боққай ошиёнига.  
Ўша тоғу тошлар юрт унинг учун,  
Ўзи паноҳ бўлгай ўз маконига.

Ўрмонлар ботири наъравор фил ҳам  
Шайлангай атрофи хатарга тўлса,  
Филчасин кўриқлаб буткул уюр жам,  
Аза очар эмиш бир қавми ўлса.

Эгасиз кимса йўқ, ҳар бир жонзотнинг  
Бордир теппасида Парвардигори.  
Азалий қонуни шулдир ҳаётнинг:  
Бузса иморатни – бузгай меъмори!

Сенинг кабоҳатинг, сенинг дастингдан  
Юртингда кўчаю кўйлар безовта.  
Туккан Ватанингга қилган қасдингдан  
Мозорлар безовта, тўйлар безовта.

Ўзбекча сўзлайсан, даҳшат нақадар,  
Каломим, сен бугун заҳар нечоғли.  
Отанг ўртанмоқда қуёшдан баттар,  
Онанинг юзлари ойдан-да доғли.

*1999 йил*

## **ИККИ ШОИР**

*(Ҳазил)*

Бир шоир арз этди иккинчисига:  
– Дўстим, шоирликдан энди воз кечгум!  
Қанча интилмайин халқнинг ичига,  
Шеъримни ўқимас, ўқимас ҳеч ким.

Иккинчиси уни юлатиб деди:  
– Олдинроқ кетибман мен сендан кўра.  
Халқ-ку ўқимасди мени ҳам, энди  
Ўзим ҳам ўқимай кўйганман, жўра.

*1999 йил*

## ЖАЗО ТОПҚУСИДИР..

Бирояга ёмон сўз айтсам мен агар,  
Тушунардим унинг жавоби қайтса.  
Чидардим ўзимга сочишса захар,  
Гинаси бўлса гар юзимга айтса.

Кимдир Ватанинга тош отса бироқ,  
Беғуноҳ бандалар бағрин қилса қон.  
Шарҳлаб беролмайман бу ҳолни мутлоқ,  
Буни тушунмайман асло, ҳеч қачон.

Сенга шеърим ёқмас, кимимдир ёқмас,  
Айт, не гуноҳи бор бутун бир халқнинг?  
Билиб қўй, бу дарё тескари оқмас,  
Сенга жазоси бор яратган Ҳақнинг!

*2000 йил, август*

## АЖРИМ

Дунёнинг ярмини сайр этди ўғлон,  
Келиб отасидан сўради ажрим:  
– Чин дўст тополмадим нега, отажон?!  
Ота эса жим.

Яна дунё кезди чарчамай ўғлон,  
Яна отасидан сўради ажрим:  
– Вафо тополмадим нега, отажон?!  
Ота ҳамон жим.

– Нега саволимга бермайсиз жавоб?! –  
Ўғлон турар эди нолакор, ҳакир.  
Ота жавоб қилди уҳ тортиб шу тоб:  
– Сен ҳам бор нарсани ахтар-да ахир!..

*2000 йил, февраль*

## ОЛИЙ НЕЪМАТ

Бир Хожа йўликди ногахон дардга,  
Холи танг, ранги ҳам айланган зардга.

Килмаган дорию дармон қолмади,  
Елиб-югуришдан армон қолмади.

Дунёдан умидин узар булди у,  
Охират кенгашин тузар булди у.

Хуллас, паймонаси тўлганда буткул,  
Кирди эшигида ишлаб юрган кул.

Қулнинг табибликка дахли бор эди,  
Унга шу аснода омад ёр эди.

Қулдан бўлдимикан Халлоқданми ё,  
Хожа шифо топи, ба ҳаққи худо:

– Аё, кул, сен бўлдинг дардим давоси,  
Қилган хизматингнинг йўқдир баҳоси.

Сочайин бошингдан олтин ва кумуш,  
Олгин хазинамдан энг катга улуш.

Истасанг, мулкимнинг тенг ярмин берай.  
Токи мен қулимни шод, хуррам кўрай.

Қул деди: – Ҳозирман хизматингизга,  
Раҳмат ҳам айтурман химматингизга.

Бирок ҳозиргина дедингиз, Хожам,  
Яъни хизматимга баҳо йўқ ҳеч ҳам.

Лекин олтиннинг ҳам баҳоси бор-ку,  
Олтиннинг баҳосин берган бозор-ку.

Ҳатгоки хуннинг ҳам нархи бор, Хожам,  
Бебахонинг бундан фарқи бор, Хожам.

Хожа ўйлаб деди: – Нима экан у?  
Қандайин неъмат у? Қандайин инжу?

Айтгин армонингни, бажаргум шу зум,  
Ахир, сен туфайли очикдир кўзим.

Қул деди: – Бир неъмат бордир – бебаҳо,  
Унга садқа булсин молу мулк, дунё.

Фалаклар бекордир унинг қошида,  
Малаклар бекордир унинг қошида.

Унга нисбат берса – қафасдир жаннат,  
У шундоқ тансик хис, тенги йўқ неъмат.

– Унинг номи не деб, кистарди Хожа,  
Сирни билмоқликни истарди Хожа.

Қул деди: – Бу неъмат жондан-да тотлик,  
Номи Озодликдир, номи Озодлик!

*1999 йил, август.*

## ГУЛЛИВЕР

Миттиларга улкан кўринар олам,  
Улканлар наздида миттидир дунё.  
Дейдилар, Гулливер деган бир одам  
Аён кўрган эмиш уларни гўё.

Атрофин улканлар қуршагани чок,  
Гулливер заррадир, у – йўк, у – ўлган.  
Митти одамчалар қошида биров  
Гулливер буюқдир, Гулливер – улкан!

*1999 йил*

## НАДОМАТ

Қаршимда турибсан ҳасратга тўлиб,  
Сабабин яшириб мендан нетасан.  
Бир нодон болани туғдириб кўйиб,  
Ўшанинг дастидан ўлиб кетасан.

Балки фақатгина умр йўлдошинг  
Сўнги лаҳзада ҳам ғамингни егай.  
Анови нодон-чи, еб бўлгач бошинг,  
На афсус чекади, на раҳмат дегай.

*1999 йил*

## ТУШ

Агарда туш билан ўзгарса дунё,  
Туш билан айланса вақту замонлар,  
Ёмон туш кўрганлар кўкармай асло,  
Кирилиб кетарди аллақачонлар.

Яхши тушлар кўрсин ҳар ким ҳам, бироқ  
Бу билан ҳам битмас дунё ишлари.  
Яхши туш кўрганлар ҳам билмай мутлок,  
Бахтли яшар эди эҳтимол бари.

*1999 йил*

\* \* \*

Стадион гувлайди,  
Одам лик тўла.  
Бу ерда жам бўлмиш турфа тил, овоз.  
Уларнинг барчасин кучиб бир йўла,  
Дўстим деб атамоқ ғалати бир оз.

Стадион гувлайди.  
Одам лик тўла.  
Фақат Ҳаққа аён улар сийрати.  
Уларнинг барчасин сўкиб бир йўла,  
Фаним демоклик ҳам анча ғалати.

*2000 йил, август*



Меъмор умр бўйи хафсала ила  
Гўзал бир иморат айлади бунёд.  
Бирок ногаҳонда машъум зилзила  
Вайрон қилди уни, қилди-ку барбол.

Худди шу сингари, қургаймиз биз ҳам  
Умр деб аталмиш гўзал бинони.  
Бирок етиб келар машъум сўнгги дам,  
Вайрон этар уни ажал тўфони.

*2000 йил, август*

## МЕН ФАҚАТ...

Мен фақат Сен учун яшадим десам,  
Бир оз лоф бўларди ва бир оз ёлғон.  
Гоҳи босганида тўфон каби ғам,  
Кўзимга кўрингай ўзимдаги жон.

Сенсиз ҳам яшадим десам мен агар,  
Десамки, сенсиз ҳам танамда бор жон,  
Ишонгил, бу гапим баридан баттар,  
Ёлғон бўлар эди, тамоман ёлғон.

*2000 йил, август*

## АКТЁР

Бир кун томошага тушиб лаҳзада  
Турфа актёрларни кўриб қайтибсан.  
Лекин сен уларни фақат сахнада  
Мавжуд деб уйласанг, бекор айтибсан.

Чин актёр санъат деб, бағрини тиглаб,  
Амаллаб кунини кўриб юради.  
Шундай инсонлар бор, бир кўзи йиғлаб,  
Битта кўзи эса кулиб туради.

Шундай инсонлар бор, вой отам, дея  
Бир зумда ўзгарар турки, сиёғи.  
Лекин ўша маҳал, ўша сония  
Онасин кўксида турар оёғи.

Шундай инсонлар бор, гўё юртпарвар,  
Юртини улуғлар гўё ҳар сўзи.  
Лекин разм солиб қарасанг агар,  
Амал поясида иккала кўзи.

Санъатга умрини ким этмиш фидо.  
Шарафи юксалсин, оламни тутсин.  
Ҳаётни ўйин деб билганнинг аммо  
Толеи кулмасин, бири кам ўтсин.

*2000 йил, февраль*

## ЙЎҚЛОВ

*Ўлмас Умарбеков хотирасига*

Чехрангда табассум балкирди доим,  
Кўнгил боғинг эди чечакли, гулли.  
Арши аълога ҳам сендек мулойим,  
Хушсурат бандалар даркор шекилли.

Хар зумда ўлимни кутиб яшамок  
Унинг ўзидан ҳам даҳшатлироқ хис.  
Сенга шундай юрак бермишди Халлок,  
Бокдинг ажалнинг ҳам кўзига мунис.

Дунёнинг тагига ўт кетсин, агар  
Бағридан яхшини ситиб чиқарса.  
Толе бўлолмагай қазойи қадар,  
Бахт асли тириклик деган бир нарса.

Ўлмас деб қўймишлар исмингни, бироқ,  
Ўлим тўлғизди-ку умр жомингни.  
Фалакнинг бу ажиб ўйинига бок:  
Ўлмас деб турибман энди номингни!

Инсон боласига шарафдир ғоят  
Халқи рози бўлиб, хотирга олса.  
Менинг ушбу шеърим сен учун шояд  
Дўстларинг номидан йўқлов бўлолса.

*2000 йил, февраль*

## СИРЛИ ОЛАМ

*Ёзувчи ва муҳаррир укам  
Ҳожиакбар ШАЙХОВга*

Ҳожиакбар, сен ажойиб адибсан, куркам,  
Мафтун этдинг бизни нурли каламинг билан.  
Бирок нега кўркитасан, муҳаррир укам,  
“Қалб кўзи”ю, мудҳиш “Сирли олам”инг билан.

Хар саҳифа орасидан девлар кутуриб,  
Инсу жинслар гуж-гуж чиқиб келаверади.  
Хотин эмас, алвастилар уйни супуриб,  
Набиралар “лиқонча”дек елаверади.

Дарпардалар силкинади сирли равишда,  
Газ ўчокдан чўзилади аждаҳо тили.  
Келининг ҳам одам эмас, ёвуз фаришта,  
Салом берган “қор одам”нинг жуп босган кўли.

Жиринглайди ярим тунда телефон ногоҳ,  
У нариги дунёлардан хабар бўлса-я!  
Симёғочда қунишган у қуш эмас, арвоҳ,  
Балки ўзга сайёрадан анов ҳамсоя?!

Улар бизни таъқиб этар сира тинмасдан,  
Бекорчидай, бошқа қилар ишлари йукдай.  
Биз ҳам учиб юргандаймиз ерга қўнмасдан,  
Латиф олма емишидан қорнимиз тўқдай.

Ҳожиакбар, айтганларим келмасин малол,  
Ўшаларинг балки дўстдир, ёинки рақиб,

Нима дейсан бу гапимга, балки, эхтимол,  
Улар эмас, биз уларни этармиз таъкиб?!

Балки улар қочиб юрар биздан ҳар лаҳза,  
Ер юзига ҳар қалай биз кўпроқ бурчлимиз.  
Бизлар моддий дунё, ахир, бизлар бор нарса,  
Билиб қўйгин, биз улардан анча кучлимиз.

Мана, битта танишим бор, шунчалар маккор,  
Минг ажинанг қилолмайди унинг ишини.  
Сухбатдоши сал анқайса, бермай ҳеч озор,  
Қоқиб олар оғзидаги бор-йўқ тишини.

Бошқаси-чи, китикламас шайтон сингари,  
Лекин гапга бирам чечан, кулдираверар,  
Қўйиб берсанг, окизади сувни тесқари,  
Фойдасига бўлмагани бўлдираверар.

Яна бирин билиб бўлмас ёшми ё кекса.  
Билиб бўлмас, сиғингани раҳмонми, шайтон.  
Битта кўзи нимадандир дув-дув ёш тўкса,  
Бошқа кўзи нимадандир чарақлар шодон.

Тагин бири қўлларингни ўпишга тайёр,  
Номинг сотиб битказади ҳар қандай ишни.  
Лойдан ўтгач, унутади барчасин, айёр,  
Ҳатто талаб қила бошлар пойин ювишни.

Булар таъма қулларидир, лўттибоз ва сук,  
Хаёлида на Аллоҳ бор, на юртнинг ғами.

Бундайларда наинки кўз, қалбнинг ўзи йўқ,  
Лекин сирга тўлиб кетган буткул олами.

Ҳожиакбар, жинларингни эплаб, аслида  
Муросага келтириш ҳам мумкинدير ҳатто.  
Лекин шундоқ ёнингдаги инсон шаклида  
Яшаб юрган иблислардан асрасин Худо!

*2000 йил, октябрь*

## ЎТИНЧ

Дунёда минг йиллик харобалар кўп,  
Урушлардан ёдгор, селлардан ёдгор.  
Мозорлар қалашиб ётибди тўп-тўп,  
Аслида улар ҳам чўнг харобазор.

Вужудимни тешар йиллар шамоли,  
Юрак тилка-тилка турфа озордан.  
Болам, хабар олгин, тутмай заволи,  
Шоир деб аталган харобазордан.

*2000 йил, 4 декабрь*

## ҚАДАҲ

Турибман кўлимда қадаҳ шу палла,  
Демак, жом сўзимни айтмасам бўлмас.  
Сизга бахт тилашим мумкин баралла,  
Лекин бахтли қилиш кўлимдан келмас.

Тилайман албатта соғлиқ ва умр,  
Тухфа қилолмасман лекин уларни.  
Тилайман ҳеч сўнмас илҳом ва сурур,  
Гарчанд беролмасман бу туйғуларни.

Мен фақат сиз учун орттириб алам,  
Йўлингиз тўсмасман деворга ўхшаб.  
Ғалвали дунёда шунинг ўзи ҳам,  
Менинг назаримда, жуда катта гап.

*2000 йил, октябрь*

## НАВРЎЗ

Аввал юрагинга мўралайди у,  
Сўнгра куртакларга ўргатади сўз.  
Заминнинг кўзидан қочади уйку,  
Демак, Баҳор келди,  
Келмоқда Наврўз!

Кишнинг аҳволига боқиб, хойнаҳой,  
Юм-юм ёш тўкмоқда эриётган муз.  
Жилва қилаётир тенгсиз бир чирой,  
Демак, Баҳор келди,  
Келмоқда Наврўз!

Она бағри каби илиқдир олам,  
Харир ҳовур ичра яйрар дала-туз.  
Қолди пучмоқларда хазон янглиғ ғам,  
Демак, Баҳор келди,  
Келмоқда Наврўз!

Яна кўнгиллардан рутубат кетди,  
Яна шуълалардан камашмоқда кўз.  
Яна дилдорликнинг фурсати етди,  
Демак, Баҳор келди,  
Келмоқда Наврўз!

*2001 йил, февраль*

## ҲАММА ГАП ШУНДА...

Ёшинг олтидами ёки олтмишда,  
Майли, қай иш билан машғулсан, бандсан.  
Қайси кенгликдасан, қай муюлишда,  
Барибир Ватанга фарзандсан.

Барчага бағрини очар шу Ватан,  
Мунаввар кундузу қоронғу тунда.  
У сени фарзанд деб олгаймикан тан?!  
Ҳамма гап шунда.

*2001 йил, 23 март*

## ВАТАН УЧУН ЯШАЙЛИК

Ўн гулингдан бир гулинг очилмаган дердилар,  
Йўлларингга сочкилар сочилмаган дердилар.  
Ўн гулинг ҳам чарақлаб очилди-ку, ох, юртим,  
Йўлларингга зар-кумуш сочилди-ку, ох, юртим.

Ўзбекистон – ягона Ватан учун яшайлик,  
Ватан ичра бу гўзал чаман учун яшайлик.

Айтмасинлар ғанимлар, кимларгадир зор бу юрт,  
Буюк Соҳибқирони, Алишери бор бу юрт.  
Аллоҳ ўзи етказган инъомини асрагай,  
Тугросини, тахтини. Исломини асрагай.

Ўзбекистон – ягона Ватан учун яшайлик,  
Ватан ичра бу гўзал чаман учун яшайлик.

Кел, азизим, ёнимга, юлдузмисан, оймисан,  
Ўзбегимсан ҳамиша, юпунмисан, боймисан.  
Ватандошим, шу тенгсиз Ватанни куйлашайлик,  
Замон келди, бизлар ҳам дунёга бўйлашайлик.

Ўзбекистон – ягона Ватан учун яшайлик,  
Ватан ичра бу гўзал чаман учун яшайлик.

*2001 йил, август*

## САҲАРЛИК

Рўза кунларида бизнинг уйда ҳам  
Ўчмасди тонггача тоат чироғи.  
Ибодат қиларди отам ва онам,  
Мен ҳам уйғонардим саҳарлик чоғи.

Мўъжаз дастурхонда шукрона таом:  
Битта чалпак нону майиз ё ўрик.  
Саҳарлик жимгина этарди давом,  
Буларнинг барига мен ҳам бир шерик.

Йиллар утиб кетди, энди мен учун  
Армон у кунларнинг ҳар бир фурсати.  
Ўша азизларим... улар йўқ бугун,  
Битган улар учун рўза муддати.

*2001 йил, 20 ноябрь*

## ЖОНИБЕК

*Набирамга*

Шу яқин кунларда дунёга келган  
Набирам бор менинг, Жонибек деган.

Унга совға излаб, кезиб ҳар ёқни,  
Ола кетай дедим битта тойчоқни.

Женева кўлининг бўйида яшнаб,  
Онаси билан у турарди кишнаб.

– Юр, тойчоқ, мен билан, Тошкентга кетдик,  
Ўртоғинг бор сенинг, исми Жонибек.

Тойчоқ ирғишларди, кетдик, дер эди,  
Бир чопсақ Тошкентга етдик, дер эди.

Онаси-чи, боқар гўё холи танг:  
– Меҳмоним, бекорга хомтама бўлманг.

Дунёда энг хушнуд, бой чоғимдир бу,  
Бу тойчоқ ўзимнинг тойчоғимдир бу!

Яхшиси, мен сизга берай маслаҳат,  
Эшитинг, у сизга ёққайдир албат.

Милти Жонибекка биздан эҳтиром,  
Тойчоқ деб атангиз уни. Вассалюм!

*2001 йил, декабрь*

## ОГОҲЛИК

Кимдир бошқаларга тилар омонлик,  
Кимдир соғинади фақат ёмонлик.

Бир карасанг ухшаш рангу рўйлари,  
Бироқ тамом бошқа фикру ўйлари.

Сиртдагисин кўриб турибсан ҳар он,  
Ичдаги олангдан огоҳ бўл, инсон!

*2001 йил, декабрь*

## ОТА ВА БОЛА

Ота дер: –Алдама сен мени, болам,  
Бари қилмишингни сезиб юраман.  
Агар қуйилмасанг мендан кейин ҳам,  
Билиб қўй, гўримда тикка тураман.

Бола дер: –Отажон, мени биласиз,  
Бирга давру даврон сура беринг-да.  
Ўша қора гўрда нима қиласиз,  
Мана, уйда тикка тураберинг-да.

*2001 йил, декабрь*

## САЙЁҲЛАР

Балки сайёҳларга туюлар шундоқ:  
Нафас олиш осон бу манзилларда.  
Бир зум яйрар инсон бу манзилларда,  
Ташвишлардан узок, ғамлардан узок.

Балки сайёҳларга туюлар шундоқ:  
Хорғиндек бу ернинг одамлари ҳам.  
Улар ҳам қайгадир кетсам дер ҳардам,  
Ташвишлардан узок, ғамлардан узок.

*2001 йил, декабрь*

## КЎМИК БИЛАН СУҲБАТ

Йирок Европага килиб саёхат,  
Битта кўмик билан бўлдим ҳамсуҳбат.

У деди. мен кичик кўмик эрурман,  
Балки олам аро мен йўк эрурман.

Асло қизикмасман сиёсат билан,  
Бу юртда юрибман тижорат билан.

Гўзал Европага асло йўк тараф,  
Лекин бир сўз айтгум уларга қараб:

Ямокни ямокка улайди улар,  
Одамгарчиликни билмайди булар.

*2001 йил, декабрь*

## СЕВИШГАНЛАР

Хиёбонда кезар икки ёш ҳабаш,  
Йигит пачок бурун, лаблари дўрдоқ.  
Ёнида нозланар маъшуқа – маҳваш,  
Оёқлари қийшиқ, тишлари сўйлоқ.  
Дунёда хунукни изласанг агар  
Булардан ортигин топмоғинг гумон.  
Йигит севгилисин қучиб авайлар,  
Қиз ҳам ошиғига боқар нигорон.  
Ушбу манзарага боқдим-у, гўё  
Бирдан кулаб тушди аршидан азал.  
Қани у лайливаш – сарвиноз барно,  
Қани у эр йигит -- етук, мукамал.  
Демислар, нисбийдир ҳар қандайин ҳол,  
Ҳар ким ўз севгиси учун сурингай.  
Анов икковлонга, балки, эҳтимол,  
Қолганлар беўхшов бўлиб кўрингай.

*2001 йил, декабрь*

## **ВАТАНДОШ**

Магар бир лаганда ош еган билан,  
Ёки битта тилда сўз деган билан,  
Улар ҳали буткул елкадош эмас.

Тўғри келса агар дили дилига,  
Садоқати бўлса тухқан элига,  
Улар ватандошдир ҳар зум, ҳар нафас.

*2002 йил, 2 январь*

## ЭЪТИРОФ

Ҳар ким ўз умрини қилса сарҳисоб,  
Турфа ҳодисалар тушгай ёдига.  
Кимдир арик қазган ё чалган рубоб,  
Ҳар ким баҳо бергай ўз ҳаётига.  
Турфадир дунёнинг хатто озори.  
Шодлиги ҳам турфа қадимдан-қадим,  
Мен ҳам шеърлар ёздим кўплар қатори,  
Лекин бошқалардан кўпроқ... алдандим.

*2002 йил, 2 январь*

\* \* \*

*Р. Бобожонга*

Муҳаббат ҳиссини асрамоқ учун  
Иморат шарт эмас, макон шарт эмас.  
Синамоқ бўлсанг гар муҳаббат кучин,  
Вақт-соат шарт эмас, замон шарт эмас.

Ўтли муҳаббатни куйлабсиз тўлиб,  
Бир Лайли ёдининг Мажнуни бўлиб.  
Уни ҳеч битта куч ололмас юлиб,  
Хатто, таърифлашга забон шарт эмас.

*2002 йил, 11 январь*

## БУ ЙЎЛЛАР

Боши, охири бор ҳар қандай йўлнинг,  
Бу йўлларнинг эса адоғи бўлмас.  
Эзгу ниятларга ошно ҳар дилнинг  
Йўлини Аллоҳим ўзи бергай, бас!

Бу йўллар таратгай Ўзбекнинг шонин,  
Неча манзилларда машъал ёққайдир.  
Бу йўллар.. Айланиб ҳали, дунёнинг  
Чаккасига гуллар таққайдир!

*2002 йил, 23 август*

## ЎЗГИН, ДЕДИЛАР

Шоир бир шеърида куйлади гулни,  
Уни ўқиганлар: – Такрор! – дедилар.  
Яна бир шеърида ёзди булбулни,  
Уни ҳам: –Бу – эски ашъор, – дедилар.

Шоир кунларини улади тунга,  
Борликни васф этиб айлади хонинг.  
Парво қилмадилар барибир унга,  
Дедилар: –Бу гаплар барчаси таниш.

Шоир шеър тўқиди севгига доир,  
Гўё мухаббатнинг ўтли бахшиси.  
Дедилар: –Буни ҳам, эй ошиқ шоир,  
Ёрингнинг ўзига ўқи яхшиси.

Наҳот одамларда сўнган ақида,  
Наҳот шеър йўлидан озгин, дедилар?  
Шоир шеър ёзганди Она ҳақида,  
– Ёзабер, дедилар. ёзгин! – дедилар!

*2002 йил, март*

## ТЕРМИЗИМ

Сен қуёш шаҳрисан, нурли бўстони,  
Ватан сарҳадида қадим қўрғоним,  
Аждодлар зиёси – илму урфоним,  
Сен шонли тарихим, ҳеч ўлмас сўзим,  
Она диёримнинг фахри – Термизим.

Миш йиллик қарвонлар изи сенда бор,  
Боболар каломи мозийдан ёдгор,  
Алпомиш қудрати бўлсин мангу ёр,  
Сен шонли тарихим, ҳеч ўлмас сўзим,  
Она диёримнинг фахри – Термизим.

Бахшилар созида янғирай истиклол,  
Полвонлар ҳаминша курашда ҳалол,  
Хур Ватан бағрида толдинг сен камол,  
Сен шонли тарихим, ҳеч ўлмас сўзим,  
Она диёримнинг фахри – Термизим.

*2002 йил, март*

## УНИВЕРСИАДА

Мухташам майдонни тўлғизиб турган  
Ватаннинг кўз нури, дилбандларидир.  
Келажак боғидан чечаклар терган  
Она Ўзбекистон фарзандларидир.

Бу сафлар камолот шиддатига мос,  
Гўё яралгандир чакиндан, нурдан.  
Мардлик ва жасорат уларга мерос  
Маҳмуд Таробийдан, Амир Темурдан.

Авлоди етук юрт ғолиб ҳамиша,  
Авлоди соғлом эл кўрмагай завол.  
Юртбоши бор экан зафарга пеша –  
Фарзандлар улғаяр, демак, баркамол!

Универсиада, бу – кўрик ва синов,  
Осойиш кунларга ярашиқ дамлар.  
Сизнинг юракдаги аланга, олов  
Минглаб тенгдошларнинг қалб кўрин жамлар.

Ҳар бир кадамингиз шахдам ва ўктам,  
Маҳорат кўргазиб, шавққа тўлгайсиз.  
Омад ҳамроҳ эрур барчангизга ҳам,  
Сиз Ўзбек диёрин фахри бўлгайсиз!

*2002 йил, май*

## САНЪАТИМ

*Бастакор Мутал Бурҳонов хотирасига*

Ўлмагай жисмимдаги жон, санъатим,  
Тоабад қалбимда иймон, санъатим.

Икки дунё мулки бирла тенг ўзинг,  
Менга ҳам бўлдинг шараф-шон, санъатим.

Гоҳ Навоий, гоҳ Хайём, гоҳ Ҳофиз  
Жўр бўлишди сенга гирён, санъатим.

Ғунчага хор ҳеч тараҳҳум қилмади,  
Хар табассумингда исён, санъатим.

Ўтди умрим, ёр дедим, ёлғиз сени.  
Зурриёдим – дилда армон, санъатим.

Сен улуғ юрт мадҳи бўлдинг, минг шукр,  
Тўлди шавққа еру осмон, санъатим.

Рози бўлгил, мен Мутал Бурҳон эдим,  
Ёдга ол, жон Ўзбекистон, санъатим.

*2002 йил, июль*

## ЧАЛА ИМОРАТ

Оғзин очиб ётар чала иморат,  
Атрофи ўраю топдан иборат.

Ҳар ён чакалакзор, бурган ва янтоқ,  
Остона ўйилган, узилган равок.

Хотирами дейсан у қаттол жангдан,  
Ё ёдгор асрлар қолдирган чангдан.

Кора туйнукларда увиллар шамол,  
Камиш том гижирлар махзун, бемажол.

Баҳор, ёз ўтади, ҳануз у чала,  
Каламушлар ғуж-ғуж, кушлар ҳам гала.

Ташландик бу уйнинг соҳиби кимдир?  
Ё фалак! Бу ҳолнинг сабабин билдир!

Бир куш ярим тунда беради садо,  
Саволимга жавоб қилгандай гўё:

– Не керак гапингнинг нега, негаси,  
Ё шоир, ё марҳум бунинг эгаси.

*2002 йил, август*

## ЯХШИ ОДАМ

Бир кун донишмандга бердилар савол:  
Айтинг-чи, дунёда яхши одам ким?  
Севиб ардоқласа элу юрт хушҳол,  
Чиндан яхши одам ўшадир балким?  
Донишманд дедики: – Майли, хар ким ҳам  
Яхши бўлгум дея хар зум уринсин.  
Майли, яхшиларга ёқсин у одам,  
Лекин ёмонларга ёмон кўринсин!

*2002 йил, август*

## ЖАННАТ ҚУШИ

*Ю. Усмоновага*

Жаннатга етишган банда яйрабди,  
Оҳанг эшитилмиш даставвал унга.  
Бугун боғимизда булбул сайрабди,  
Тегмангиз лоақал сиз шунга...  
Майли, у тўйганча таратсин оҳанг,  
Тегмангиз, мухлислар, тегманг, дарғалар!  
Ахир кулокларни қилганди батанг,  
Қағиллайверишиб қарғалар...

*2002 йил, август*

## ЗИЁРАТ

Бобо набирасин етаклаб бир кун,  
Қабристонга борди зиёрат учун.

Марҳумларга тилаб ажру ҳаловат,  
Бобо тиз чўкканча қилди тиловат.

Набира сўради: –Бобо, булар ким?  
Бобо жавоб қилди: –Яхшилар, ўғлим.

Набира дафъатан сўз қотди шу он:  
–Ёмонларнинг қабри қайда, бобожон?..

*2002 йил, август*

## ИЛТИЖО

Ғоятда чарчадим,  
Толиқдим ғоят,  
Ҳисоб қилавериб ғанимни, ёвни.  
Тирноқча яхшилиқ тиласанг, фақат,  
Ука, ёмонлама менга бировни.

Инсон яшар ахир эзгуликка зор,  
Санаб етарми у йўлларда ғовни.  
Мен ҳам ором олай ҳеч курса бир бор,  
Ука, ёмонлама менга бировни.

*2002 йил, август*

## ОСОН ЭМАС

Яшаш осон эмас яхши одамга,  
Алдов нимашигин билмайди чунки.  
Гўдак кўзи билан боқар оламга,  
Мудом бошкаларга бўлади кулки.  
Яшаш осон эмас яхши одамга,  
Чунки ёмонликдан килар у хазар.  
Яхшининг кераги камдир оламга –  
Ёмонларнинг дасти узун бўлса гар...

*2002 йил, август*

## РИВОЯТ

Бир кун халойикнинг олдида ошкор  
Муттаҳам ўғрининг кўлин чопдилар.  
Ниҳоят жазосин олди-ку маккор!  
Йиғилган одамлар таскин топдилар.  
Ўғри-чи, атрофга боқиб ҳар нафас,  
Сизнинг гўллингиз билгандим, дерди.  
Ўша ўғирликни у кўлим эмас,  
Буниси билан мен қилгандим, дерди.

*2002 йил, август*

## ҚЎМСАШ

Оҳ, яхши кунларим,  
Сизни қўмсайман.  
Сиз энди боламнинг ўйисиз.  
Оҳ, яхши кунларим,  
Сизни қўмсайман.  
Сиз энди набирам тўйисиз.  
Оҳ, яхши кунларим,  
Сизни қўмсайман.  
Сиз энди эртага саломим.  
Оҳ, яхши кунларим,  
Сизни қўмсайман,  
Сиз балки қолажак каломим...

*2002 йил, август*

## ТОШКЕНТИМ

Истиклол шавқида жўшган Тошкентим,  
Юртбошим назари тушган Тошкентим.

Тонгда салом билан балқади қуёш,  
Унга пенвоз чиқар аввал кўҳна Шош.

Буюк қопоналар, кенг, равон йўллар,  
Чаманзор боғларим, фаввора, кўллар.

Мангу чарақлагай жамолинг сенинг,  
Юртим камолидир камолинг сенинг.

Истиклол шавқида жўшган Тошкентим,  
Юртбошим назари тушган Тошкентим.

*2002 йил, август*

\* \* \*

Тошкентим, Тошкентим, Онажон,  
Элларга меҳрибон, жонажон.  
Ўзбегим фаҳрисан, Пойтахтим,  
Маърифат, зиёга бой тахтим.

Нақарот:

Қадимий Шош шаҳрим,  
Юртимда бош шаҳрим.  
Истиклол йўлида  
Довонлар ош, шаҳрим.

Сен улуғ аجدодлар макони,  
Озод, тинч авлодлар ошени,  
Меҳмондўст халқимнинг шонисан,  
Табаррук Тошкентим номисан.

Нақарот:

Дарёдек жўш урган кўчалар,  
Чароғон юлдузли кечалар.  
Санъатим, нурафшон пешонам,  
Сен ўзинг энг олий кошонам.

*2002 йил, август*

## ЎН БИРИНЧИ ДУР

Ҳар йилга мен ўзни масъул сезгайман,  
Йиллар шодасига бир дур тизгайман.

Фараҳбахш кунлардан то кўнглим тўлди,  
Шодада дурларим ўн битта бўлди.

Ҳар битта дуримнинг номи бор, алҳол,  
Ҳар бири бетакрор, юлдузлар мисол.

Озод Ватанимдан нишон ҳар бири,  
Жам унда халқимнинг фаҳри, гурури.

Умр тугар балки, туғанмас шода,  
У инсон умридан фузун, зиёда.

Бу Ҳурлик маржони қолмагай ярим,  
Уни тўлдиради набираларим.

*2002 йил, август*

## ҒАЛАТИ МАНТИҚ

Ажал келса не дийдалар  
Ёшланади.  
Хонадонда ғам-гашвишлар  
Бошланади.  
Қабристоннинг ғалвасин-ку  
Қўятуринг.  
Зудлик билан кўчасини  
Қайта қуринг.  
Анов эски симёғочни  
Бўяш керак.  
Кесинг дарров, кўринмасин  
Манов терак.  
Ўйдим-чуқур йўлларни тез  
Асфальт қилинг.  
Жанозага ахир кимлар  
Келар, билинг!..  
Бундай чоғда ҳамма тотув,  
Эш бўлади.  
Бир кечада ҳамма ишлар  
Беш бўлади.  
Воқеалар бирданига  
Эврилсайди,  
Шўрлик марҳум бир фурсатга  
Тирилсайди.  
Кўрар эди, маҳалласи  
Нечоғ тўқис.  
Кўчаси ҳам бинойидек,  
Равон. текис.  
Ҳолбуки, у шу йўллардан  
Ўтганди-ку.

Қиш-кировкада автобус ҳам  
Кутганди-ку.  
Босим ошиб, кўзлари ҳам  
Тинган эди.  
Яхда тойиб, оёғи ҳам  
Синган эди.  
Йўл тузалди, бироқ марҳум  
Юрмай кетди.  
Тиригида бу ҳурматни  
Кўрмай кетди.  
Гапларимдан бошқа маъно  
Ахтармангиз.  
Йўқни бору, борни йўқ ҳам  
Деманг харгиз.  
Бундай ҳолга на йиғлаб, на  
Кулиш керак.  
Наҳот бир иш битиш учун  
Ўлиш керак.

*2002 йил*

## БЎЛДИЛО

Дедим: Ёшлигимни қайтиб бер, замон,  
Деди: У гулларинг пайхон бўлдило.  
Дедим: Тик қилсанг-чи қаддимни, даврон,  
Деди: У тоғларинг сайхон бўлдило.

Фалакка етмади чеккан унларим,  
Тийра кундузларим, қора тунларим,  
Бахтиёр. беармон кечган кунларим  
Энди тутқич бермас жайрон бўлдило.

Йиллар жароҳатин борми давоси,  
Бормикан Лукмони, борми Синоси.  
Муҳаббат мулкининг нозик биноси  
Хижрон сели ила вайрон бўлдило.

Бахтга зор бўлсам-да куйладим бахтни,  
Саробга термулиб, бой бердим нақдни.  
Гоҳида сомондек совурдим вақтни,  
Кўрганлар тамоми ҳайрон бўлдило.

Сув излаб, қумларга дуч келдим баъзан,  
Мадад беролмадим дўстга дафъатан.  
Ёвларим қуршади мисоли тикан,  
Не-не орзуларим армон бўлдило.

Бу фоний дунёда мен ҳам бир сайёҳ,  
Гоҳида шошилдим, шошилтирдим гоҳ.  
Асл манзил экан у Олий даргоҳ,  
Колгани шунчаки сайрон бўлдило.

*2002 йил. сентябрь*

## АДОЛАТ КЎЗГУСИ

Ўлтирган жойингда сакрайверма, бас,  
Жимгина ором ол топган аршингда.  
Қанча буюкликни қилмагил ҳавас,  
Адолат кўзгуси турар қаршингда.

Гарчи барчамизга тақдир ҳукмрон,  
Гарчи тенг қошида – чинордир, ҳасдир.  
Пушкин аталмагай ҳар битта қурбон,  
Ҳар бир қамалган ҳам Чўлпон эмасдир...

*2002 йил, сентябрь*

## ЮПАНЧ

Бечораман, дея ўқивма, иним,  
Сенга ўхшаганлар дунёда бисёр.  
Бир парча нон учун, ўтсин деб куним,  
Томирдан қонини бергувчилар бор.

Бахтиёр зотлар ҳам мавжуддир, бироқ  
Улар ҳам тириклик оворасидир.  
Зимдан назар солсанг, шу ер – думалок –  
Асли бечоралар сайёрасидир.

*2002 йил, сентябрь*

## ОЛЛОҲНИНГ ИШЛАРИ

Оллоҳим гоҳида болага ўхшанг,  
Шўхликни ёқтирар, ўйинкарокдир.  
Тоғларга қарасанг – келгудай тўкнаш,  
Аслида йирокдир, жуда йирокдир.

Гоҳида томоша қилай деб Халлоқ,  
Бировнинг юмушин боликага бергай.  
Чунончи, бир эркак бўйса тирнок,  
Хотини ҳовлида гувала тергай.

Ҳазили оғир ҳам бўлар гоҳи дам,  
Шодликка эш қилиб юборар кулфат.  
Агар бир шахд қилса Яратган Эгам,  
Арслонга шоқолни айлагай улфат.

Кимнинг ўз уфқида икболи кулса,  
Масхара бўлмайди ўша ягона.  
Менга амалдорлик қанча ёт бўлса,  
Сенга шоирлик ҳам шунча бегона.

*2003 йил, 16 февраль*

## ЯХШИЛИК

Бу ёруғ дунёда даврини суриб,  
Бировга яхшилик қилмаганлар бор.  
Ва лекин бир умр яхшилик кўриб,  
Унинг нималигини билмаганлар бор.

Оғир дард чеккандим мен ҳам бир замон,  
Бегона элларда, дўстлардан йирик.  
Мадад берган эди улуғ бир инсон,  
Мен унинг сиймосин унугай қандок.

Ярқираб турибди кўксингда юлдуз,  
Осмондан тушмаган у ҳам, ҳойнахой.  
Кимдир сен ҳақингда айтди яхши сўз,  
Шундан кўкрагингда юлдуз топди жой.

Дейдилар, дунёнинг доим бири кам,  
Яхшилик қилиш ҳам осонмас бироқ.  
Менинг назаримда, яхшиликдан ҳам,  
Унинг қадрин билмоқ минг бор яхшироқ.

*2003 йил, 16 февраль*

# ТОМЧИ ЙИФИЛМАСА ЖОМ ҲАМ ТЎЛМАЙДИ

## ҚАЛАМ

Эркалангиз қаламни олиб,  
Ўпиб қўйинг уни мулойим.  
Шўрлик ўзи яланғоч қолиб,  
Кийинтирар этасин доим.

1963

## ҲАСАД

Идроким борича яшадим фақат,  
Фаҳм этдим дунёни баимкон, қат-қат.  
Ёлғиз бир жумбоққа ақлим етмади:  
Қайдан тугилади, билмадим, ҳасад.

1968

## НИГОҲ

Ох, у кунлар қайтмагай зинҳор,  
Ўчган муҳаббатнинг ёнмоғи душвор.  
Нигоҳинг қадама қароғимга сен,  
Унда тўкилмаган кўз ёшларим бор.

1969

## ШОИР

Демангиз, дунёнинг ташвиши қолиб,  
Ўзини ҳар ёнга уради шоир.  
Тоғдай оғир юкни кифтида олиб,  
Қундай енгил бўлиб юради шоир.

1970

## ЎГАЙ

Булбул ўгай эрур зоғлар орасида,  
Югурик сув ўгай тоғлар орасида.  
Муҳаббат дардидан бемор қалблармиз,  
Ўгай бўлсак не тонг, соғлар орасида.

1971

## ИҚТИБОС

Ногоҳ энтиқди-ю, эгилди камон,  
Ўқ учди билгисиз ёқларга томон.  
Кекса отасининг қақдин дол этиб,  
Кетиб борар эди фарзанд шу замон.

1971

## **МЕН АНГЛАБ ЕТГАН ФАЛСАФА**

Бозорга ўхшайди асли бу дунё.  
Бозорга ўхшайди бунда ҳам маъни.  
Иккиси ичра ҳам кўрмадим асло,  
Молим ёмон деган бирор кимсани.

*1973*

## **БИР КИМСА**

Сахро сўкмоғида бошин эгиб жим  
Бир кимса кетмоқда, билмасман у ким.  
Агар у сен бўлсанг, қошинга борай,  
Агар у мен бўлсам, тезроқ кел, дўстим.

*1975*

## **АБАДИЙ САДО**

Тинила, бу абадий садо бўлади,  
Гадонинг душмани гадо бўлади.  
Иккови бир-бирин егунича то  
Ўртада бу дунё адо бўлади.

*1975*

## ТАҚЛИДЧИ ШОИРГА

Тақлид қила бергин етса бардошинг,  
Модомики сенда бор экан хавас.  
Фақат бир қора кун кўтариб бошинг.  
Асл пусхаман деб дод солмасанг бас.

1976

## МИШ-МИШ

Унинг миш-мишидан ранжиманг асло,  
Нима бўлса асли наслида бўлган.  
Она қорниданок ўзи ҳам ҳатто  
Асли миш-миш билан дунёга келган.

1977

## ТАРЖИМАИ ХОЛ

Дўстлар учрашади: – Салом! – Яхши қол!  
Аслида мана шу таржимаи ҳол.  
Ғанимлар дуч келар – жанг бўлар пухта,  
Таржимаи ҳолга қўйилар нукта.

1977

## КОИНОТ ГУЛТОЖИ

Коинот гултожи инсондир азал,  
Ундадир энг олий тафаккур, амал.  
Ҳатто у тубанлик ичра ҳам танҳо,  
Ё фалак, ижодинг бунча мукаммал.

1977

## НИЯТ

Ҳар калай, кўлимда шарбат тўла жом,  
Гар маҳзун бўлса ҳам қалбимда илҳом.  
Энди бир самимий дўст ҳам топсайдим,  
Бахтли санар эдим ўзни батамом.

1979

## ПАНД

Оқар дарёга ҳам кимдир банд берган.  
Ҳаёт кимга заҳар, кимга қанд берган.  
Эй ғофил, саркаш деб мени камситма,  
Ғаним сенга эмас, менга панд берган.

1979

## ИСТАК

Орзум шул, ўчмасин ёнган чироғинг,  
Юлдуздай нур сочсин чашминг – қароғинг.  
Магар чинор бўлсанг, чинордай яша,  
Бевақт узилмасин бирор япроғинг.

1979

## ДОНИШМАНД ДЕДИКИ

Донишманд дедики, осонни кутма,  
Имкондан ортиқ бир имконни кутма.  
Дарёдан дарёни талаб айлагил,  
Ва лекин ҳеч қачон уммонни кутма.

1980

## ЗАМИН АЙЛАНАДИ

Замин айланади, чиқади куёш,  
Харғиз кибр билан кўтармагин бош.  
Оёқ остингдаги харсангни тепма,  
Балки хайкал булар сенга ўша тош.

1982

## КАЪБА

Самода юрибди ҳануз ёлғиз ой,  
Танҳолик қийнайди уни хойнаҳой.  
Йўқликдан ахтардим сенинг васлингни,  
Ким қайта сизинса. Каъба ўша жой.

1983

## ШУКР АЙТАЙ

Шукр айтай, кўл яхши умр кўрдим мен,  
Гоҳ яйдоқ шамолдай даврон сурдим мен.  
Лекин сени кўрсам, булут олдида  
Чорасиз йўлбарсдай ҳайрон турдим мен.

1983

## ИКБОЛ

Туғилсанг – бахт билан камол ўшадир.  
Тарк этсанг оламни – завоқ ўшадир.  
Охир чоғ тупроғинг устига келиб  
Кимдир ёд айласа, икбол ўшадир.

1983

## **ҲАСАДГҮЙ ҲАКИДА**

Ўзи оддийгина,  
Кам йўк ишида,  
Тонналаб кумир бор  
Лекин ичида.

*1983*

## **ОФТОБ БОТИБ КЕТДИ**

Офтоб ботиб кетди, эгилди бошим,  
Юлдуздек сочилди кўзимдан ёшим.  
Ҳажрингда бағримни ерга берурман,  
Тун бир лаҳад бўлса, ой қабр тошим.

*1984*

## **БИЛАМАН...**

Биламан, ўтади шодлик билан ғам.  
Биламан, ғанимат эрур ҳар бир дам.  
Пайғамбар атадим ҳар зотни, аммо,  
Муридим демади ҳеч битта одам.

*1984*

.

## **АҚЛ ХАҚИДА**

Шунчалар гузалсан, гўзалсан, санам,  
Таърифнинг битмоққа ожиздир калам,  
Бир йигит умрини обод этардинг,  
Ақл ҳам берганда фалак боқарам...

*1986*

## **ДЎСТЛАРИМ...**

–Нега қаддинг эгик, нега бошинг ҳам,  
Нега нигоҳингни тортади тупрок?  
–Менинг ер устида танишларим кам,  
Менинг ер остида дўстларим кўпрок.

*1986*

## **ТАҚДИР ЙЎРИФИДАН...**

Тақдир йўриғидан розиман минг бор,  
Менга дуч айлади сени, эй нигор.  
Кўзингда поёнсиз умримни кўрдим,  
Сенсиз бир лаҳзанинг ўтмоғи душвор.

*1987*

## СОБИТЛИК

Ўчиб бораётир қапчалар калом,  
Не-не битиклар ҳам йўқдир, вассалом.  
Дунёда фақат бир собит суҳан бор:  
У ўз фарзандинга ўзинг қўйган ном.

1987

## КУРДИМ

Соддадил одамни жула кам кўрдим.  
Борин ҳам шикаста, кўзин нам кўрдим.  
Дунёда фирибгар кўп экан лекин,  
Уларнинг барчасин шод-хуррам кўрдим.

1987

## ЭЛ КЎЛЛАСА

Эл кўлласа, азизим, омон бўлсак, ажабмас.  
Кўлламаса – ранг-рўйи сомон бўлсак, ажабмас.  
Элни биздан қизганиб сўз айтгучи зотлар бор,  
Улар учун бир умр ёмон бўлсак, ажабмас.

1987

## ГУРУХБОЗ

Битта ўзи пашшани ҳам йиқолмайди.  
У жойга ҳам битта ўзи чиқолмайди.  
Кайга борса атрофига шерик тўплар,  
Йўқолса ҳам битта ўзи йўқолмайди...

1987

## БИР ВАКТ БОШОҚ ЭДИМ

Бир вақт бошоқ эдим, қирларда ўсдим,  
Сўнг яхлит дон бўлиб қўлингга тушдим...  
Кейин-чи, ташладинг тегирмонга сен,  
Кафтингда ун бўлиб турибман. дўстим.

1987

## МАРД БЎЛСАНГ

Қадимдан бир гапни уқтирар хаёт:  
Мард бўлсанг, ўз тўғри йўлингдан қолма.  
Ўладиган бўлсанг ўз гўрингда ёт,  
Бировнинг мозорин эгаллаб олма.

1987

## ТААССУРОТ

Табиат кимга кўп ё оз берибди,  
Кимгадир халачўп ё соз берибди.  
Во ажаб, мана бу машшоқ гадойга  
Тенги йўк шохона овоз берибди.

1987

## ХАР ГАЛ АЙЁМЛАРНИ...

Хар гал айёмларни айларман тавоб,  
Гарчанд бири моддий, ўзгаси сароб.  
Шўрлик она замин бирликка зор-ку,  
Унга талпиниш ҳам, демак, зўр савоб!

1987

## ОҚШОМДАН БОШЛАНГАЙ...

Оқшомдан бошлангай одатда тонглар,  
Сукутдан узилгай гулдурас, бонглар.  
Бошинг букма сира, хокисор банда,  
Эрга рухинг топгай олий оҳанглар.

1987

## ҚУШ ТИЛИ

1

Бўрон, сен шам узра гувлайверма, бас,  
Арслондек ўкириб чекаверма сас.  
Шамни ўчирмоқлик жуда ҳам осон,  
Унга етар битта “нуф” деган нафас.

2

Феълини кузатиб содда боламнинг,  
Ташвишин ўйлайман чигал оламнинг.  
Соддалик яхши-ку, лекин кўпинча  
Иши юришаркан қитмир одамнинг.

3

Қушларнинг тилида фақат бир оят,  
У инсон учун ҳам ибратдир ғоят.  
Қушлар дер: –Илойим, кафасга тушма,  
Тушган бўлсанг агар чиккил ниҳоят.

4

Бир хазил тўқидим бугун сенга деб,  
Чақалоқ йиғлайди нега “инга” деб.  
“Инга-инга”сининг маъноси шулки,  
Даъво қилаётир “менга”, “менга” деб.

Майлига, рақибинг бўлсин ҳар нима,  
 Ҳеч замон сен унинг ғамини ема.  
 Унга ҳар балони раво кўрсанг ҳам,  
 Тилингни суғуриб оламан дема.

Назар сол ҳаттоки етти кат ерга,  
 Киёс топилгайдир ўтган умрга:  
 Олтинга айланган яхшилар хоки,  
 Ёмонники эса қора кўмирга.

Бир доно базмининг гувоҳи бўлдим,  
 Шодумон даврада уйнадим, кулдим.  
 Базмининг боисин сўрасам, деди:  
 --Бугун мен нодондан қочиб қутулдим.

*Абдулла Қодирийга*

Азалий ҳақ тапни яширмоқ нечун,  
 Завол йўқ энг асл истеъдод учун.  
 Агарда қоиот тегирмон бўлиб,  
 Оламни янчса ҳам, қолгай у бутун.

Эски алифбони дилга қилсанг жо,  
Мана бу хикматни унутма асло:  
Эгри ниятнию ювуксиз кўлни  
Сира ёқтирмайди ўша алифбо.

Халқим деб югурар ховучлаб жонин,  
Халқига бағишлар шуҳратин-шонин.  
Лекин шу чоқишда кета-кетгунча,  
Тозалаб боради халқнинг ҳамёнин.

•

1988

## **ТУРФА ТУЙҒУЛАРНИ...**

Турфа туйғуларни хуш кўрдим гоят,  
Дунёнинг ўзи ҳам рангин ниҳоят!  
Боқма ажабланиб сатрларимга,  
Бахтим ривоятдир, ғамим хикоят...

1990

## **ДУНЁ ЙЎРИҒИ**

Дунёнинг ғалати йўриғига бок,  
Кимга айш ташнаю кимга дор муштоқ.  
Лекин ҳаммасидан маъно биттадир:  
Қурбон олдин кетар, жаллод кейинрок.

1991

## **ШУДҒОРДА...**

Шудғорда қарғалар тўдасин кўрсанг,  
Сира ажабланма, бўлма хангу манг.  
Сен ерни ағдариб, шудғор қилган чоғ  
Юзага чиққанди қурту чувалчанг.

1991

## ИККИ МУСУЛМОН

Эҳром кийиб олган икки мусулмон  
Бир-бирин сўкишиб чой талашарди.  
Асли билмасдилар, шу зум икковлон  
Дўзахнинг тубидан жой талашарди.

1992

## АДАША-АДАША

Кезиб бу шаҳарни балки ҳоргайсан  
Ва лекин Аллоҳга дилинг ёргайсан.  
Адаша-адаша Маккани топдинг,  
Энди адашсанг гар қайга боргайсан.

1992

## ҚУЛ ВА ҚУЁШ

Демасман, зулматда мудом фарёд қил,  
Ҳиммат нури билан дилни обод қил.  
Расулуллоҳ демиш: – Ошма ҳаддингдан,  
Қуёш тutilганда қулни озод қил!

1992

## ХАЛҚНИ АСРАСАНГ

Хеч кимса девор билан ажралганмас оламдан,  
Вужудингга туташдир тегрангдаги шу хилқат.  
Яхшилиқ қил ҳаммага, қайтажак ўзингга ҳам,  
Сен ўзингни асрайсан халқни асрасанг фақат.

1992

## ШЕЪР, ФАРЗАНД...

Шеър, Фарзанд, Яхшилиқ – мисли полапон,  
Тарқалиб кетдилар ҳаммаси хар ён.  
Оламда қанчаки ёмонлик бўлса,  
Ёпирилиб келдилар бари мен томон.

1992

## ОДАМИЙЛИК

Бир кун тўкин бўлар юпқа дастурхон,  
Зарбоф бўлмаса ҳам кийгайсан чопон,  
Лекин одамликни унутар бўлсанг,  
Уларнинг барчаси хайф сенга, инсон!

1992

## **ХАҚ СЕВГАЙ**

Хак севгай ўзига ёр бандаларни,  
Дилида иймони бор бандаларни.  
Такаббур бошларни пастрокка эгса.  
Юксакка кўтаргай хор бандаларни.

1992

## **ПАЙДО БЎЛГАНИДА...**

Пайдо бўлганида замин ва замон,  
Аввал яралгандир дарахт ва хайвон.  
Бул икки соддани алдамоқ учун  
Ақлини пеш қилиб чиққан сўнг Инсон.

1994

## **БИР ЙЎЛ ЧЕККАСИДА...**

Бир йўл чеккасида ётибман нолон,  
Чорасиз бўлсам-да, мен ҳам тирик жон.  
Устимга отингни сояси тушди,  
Жиловини нари тортсанг-чи, нодон.

1994

## **БАЛКИ ЧАМАН БЎЛАР...**

Балки чаман булар дашти Карбало,  
Балки, беҳишт мавжуд юлдузлар аро.  
Менинг Ўзбекистон – Ватаним бордир.  
Уларнинг баридан аълороқ, аъло!

1994

## **БОЗОР ИҚТИСОДИ**

Шеърим, айтган сўзим, ба ҳукми замон,  
Тарқалиб кетдилар ҳаммаси ҳар ён.  
Қалбларда тинч-тотув яшарми улар,  
Бозор иқтисоди билан ёнма-ён.

1994

## **АЧИНМА**

Ачинма шоирга хорлиги учун.  
Ёки парча нонга зорлиги учун.  
Билиб қўй, аслида яшайди шоир.  
Дунёда мухаббат борлиги учун.

1994

## АМУДАРЁГА

Кимлигимни билар эдим озрок,  
Билар эдим суюклигимни.  
Амударёни кўрганда бироқ  
Билиб қолдим буюклигимни.

*1995*

## ЭЗГУЛИК ПОСБОНИ

Дўстим. Ҳақ деганни қўллагин фақат,  
Парвоз қилар бўлса – осмони бўлгил.  
Ёвузликка қарши қудратинг кўрсат,  
Мудом эзгуликнинг посбони бўлгил.

*1996*

## ЎЗБЕКИСТОН УЧУН ДЕНГИЗ ЎЗИНГИЗ

1

Аллохим қайда деб бермагил сўрок,  
Яхлиси, мана бу манзарага бок:  
Қозоннинг ичида оташин тафт бор,  
Оловнинг ўзини кўрмассан бирок.

2

Билмасдан бировни ранжитма, болам,  
Билмасдан бировни мактамагин ҳам.  
Фунчанинг бағри қон дейди шоирлар,  
Бирок очилганда не чоғлик кўркам.

3

Эй инсон, назар сол ўнгу сўлингга,  
Муносиб баҳо бер ушбу йўлингга:  
Молни бўқиртириб сўясан, аммо  
Ўқрайсан, зирапча кирса қўлингга!

4

Жаннат дер: –Хуш келдинг,эй қарам аҳли,  
Аъроф дер: –Сабр қил, эй алам аҳли.  
Бу ерда ҳеч банда жавобсиз қолмас,  
Дўзах дер: –Ён энди, муттахам аҳли.

5

Хис этиб дунёнинг шодлигин, ғамин,  
Улуғ бир ҳикматга бўлганман амин:  
Яхшию ёмонни кўтараркан тенг,  
Шу боис, она деб ном олмиш замин.

6

Ўзбегим, муносиб посбонларинг бор,  
Сарҳадларда пўлат қалқонларинг бор.  
Сен улуғ Темурнинг зурёдидирсан,  
Мангуберди каби ўғлонларинг бор.

7

Халқимнинг истиклол аҳди мангудир,  
Буюк давлатимнинг тахти мангудир.  
Келажак кўзимиз қароғи бўлса,  
Жажжи фарзандларнинг бахти мангудир.

8

Эй Ажал, мен сендан кўркмасман ҳеч ҳам,  
Рўбарў келмоққа тайёрман ҳар дам.  
Сабаби биттадир, сабаби битта:  
Сенга дуч келдилар Отам ва Онам!

9

Тикланиш бир ёнда, нураш бир ёнда.  
Жавоб бир ёндаю сўраш бир ёнда.  
Бу кўхна дунёни тинч кўрмадим ҳеч,  
Аҳиллик бир ёнда, кураш бир ёнда.

10

–Афсус, жахонаро денгизимиз йўк...  
Гоҳо ўкинч билан янграр сўзингиз.  
Лекин, Ислом ака, менинг кўнглим тўк:  
Ўзбекистон учун денгиз ўзингиз!

1998

## УРИНМА, БОЛАҚАЙ

Уринма, болакай, уринма, ҳарчанд  
Бағрингни мен каби тиглай олмассан.  
Мен каби кувониб, куларсан гарчанд,  
Лекин мен сингари йиғлай олмассан.

*1998*

## МУКОФОТ

Кўлу тўкайларда юради лайлак,  
Полапонлар ризкин теради лайлак.  
Полапонлар эса оғзини очиб,  
Ўйлайди, мукофот беради лайлак.

*1998 йил*

## САБОК

Мана бу хикматга, дўстим, сол қуюк,  
Балки сену менга бўлгай бир сабоқ.  
Посбоннинг қовоғи уйшган булса,  
Хатто жаннатга ҳам тортмайди оёқ.

*2000 йил, 4 декабрь*

## СЎЗ

Сўз асли пайгамбар,  
У боис балки  
Одамзот таниган уз Худойини.  
Эриган темирнинг томчиси каби  
Ўртаб юборар у теккан жойини.

*2001 йил, декабрь*

## ДЎСТЛИК

Биз битта дарахтнинг шохчаларимиз,  
Бир боғнинг туташган боғчаларимиз.  
Замин коинотда бир тоғ бўлса, биз –  
Бир-бирин суяган тоғчаларимиз.

*2002 йил, 13 январь*

## НАВОИЙ

Абадият билан қай сўз эгизак,  
Балки яхши орзу, яхши ниятдир?  
Мангулик англонар Навоий десак,  
Навоийнинг ўзи Абадиятдир.

*2001 йил, 6 февраль*

## **СИЗНИНГ БОРЛИГИНГИЗ..**

Мавжудлигим балки ўзимга керак,  
Тахтим оиламнинг балки тахтидир.  
Ислом ака, Сиз бор – биз голиб бешак,  
Сизнинг борлигингиз халқнинг бахтидир.

*2001 йил, 22 март*

## **УСТОЗ**

Дедилар, дунёда асли ким азиз,  
Айтдилар, устоздир, устоз бегумон.  
Тағин айтдиларки, азиз шубҳасиз  
Устозин кадрига етолган Инсон.

*2002 йил, август*

## **МУТОЙИБА**

Дунё кенг, шаталок отиш мумкиндир.  
Ёки харсангтошдай ётиш мумкиндир.  
Эсирган айтгандек, хакикий дўстни  
Сотиб олиб бўлмас, сотиш мумкиндир.

*2002 йил, сентябрь*

## ШЕЪР

Тўй қил, ошингга ҳам шеър ёзилгайдир,  
Тўлган ёшингга ҳам шеър ёзилгайдир.  
Сен шеърга беписанд боқма, эй нодон,  
Ўлсанг тошингга ҳам шеър ёзилгайдир.

*2002 йил, сентябрь*

## МУАЛЛИМ

Шоирга дедилар:

– Сиз бахтли инсон,

Халқингиз ардоқлар, ҳамма танийди.

Шоир жавоб қилди:

– Менда бир армон:

Муаллим десалар мени қанийди!

*2002 йил, сентябрь*

## ОМАД

Шогирд хитоб қилди устозга қараб:

– Омадим келмади сира, во ажаб!

Устоз жавоб қилди: – Сиз кўп, омад оз,

Ҳаммага етмайди омад. Шу сабаб.

*2002 йил, 1 октябрь*

## ЎГИТ

Мана, ўтиб олдинг асал ойидан,  
Энди сув ичгайсан турмуш сойидан.  
Етти ўлчаб бир кес, етмиш ўлчаб кес,  
Лекин кес Ёшулли айтган жойидан.

*2002 йил, 1 октябрь*

## САВОБ

Савобдир, жилғага сойсан, деб айтсанг,  
Ё хунук аёлга ойсан, деб айтсанг.  
Бойни камбағал де. хурсанд бўлади,  
Камбағалга эса бойсан, деб айтсанг.

*2002 йил, 10 октябрь*

## ЖАННАТ

Кўзларинг тубидан тошдим мен макон.  
Кириқларинг бўлди панжарасимон.  
Бул ажиб жаннатга ноил бўлганнинг  
Ҳаққиға лабларинг ўқирди Куръон.

*2002 йил, 12 октябрь*

## АРМОН

Бир дўстим дер эди: – Гарчи қорним тук,  
Бир инсон умрини яшадим тўлик.  
Кўрдим бойликни ҳам, мартабани ҳам,  
Лекин ўз уйимда кун кўрганим йўк.

*2002 йил, 12 октябрь*

## ИНСОН

Биринг юлдузларни кўзлайсан, Инсон,  
Биринг мангуликка битасан достон.  
Биринг тор кўчага номим кўяй деб,  
Елиб-югурасан эрта-кеч сарсон.

*2002 йил, 14 октябрь*

## ХАЛҚ

Дунёда мантиқсиз ҳеч иш бўлмайди,  
Томчи йиғилмаса жом ҳам тўлмайди.  
Биз томчи эруرمىз, халқ эса уммон,  
Халқ ўлмас, томчи ҳам, демак, ўлмайди.

*2002 йил, 16 октябрь*

## КАДР

Яхшиларни ўткиз уйнинг тўрига,  
Тан бер инсонларнинг асл – зўрига.  
Ва лекин ҳеч қачон топшира кўрма  
Донони нодонга, қўйни бўрига.

*2002 йил, 21 октябрь*

## ХУСУМАТ

Кўролмасанг бировни сувига банд бергайсан,  
Захар солиб ошига, ёвига қанд бергайсан.  
Кўролмасанг подшоҳни камситгайсан юртин ҳам,  
Чавандозни кўролмай отига панд бергайсан!

*2002 йил, 21 октябрь*

## КИЁФА

Кўрингай дунё бор киёфасида:  
Гоҳ сичқон, гоҳи мор киёфасида.  
Азройил дер эмиш: – Мен эса баъзан  
Кўрингум шифокор киёфасида.

*2002 йил, 27 октябрь*

## **ХУРСАНДЧИЛИК**

Одам кучди бир кун Шайтон – жононни,  
Бу ҳол хурсанд қилди ҳар икковлонни.  
Шайтон дер: – Одамни йўлдан урдим-ку,  
Одам дер: – Кўрмовдим фақат шайтонни.

*2002 йил, 28 октябрь*

## **АФАНДИ**

- Кўй етаклаб ўтди-ку биров,
- Менга нима, деди Афанди.
- Сизникига қараб кетдиёв,
- Сенга нима, деди Афанди.

*2002 йил, 28 октябрь*

## **ШАЙТОН**

Шайтон – шайтон эди, текканди жонга,  
Одам Ато тутиб тикди қозонга.  
Сўнг роса коворди, еб ҳам тугатди,  
Шайтон шод, кирганди у энди қонга!

*2002 йил, 30 октябрь*

## ВАКТ

Сув келаётир, дейди битга набирам,  
Сув кетаётир, дейди бошкаси шу дам.  
Мен улар фикрига бир сўз демадим,  
Чунки ҳақ эди-да иккаласи ҳам.

*2002 йил, 31 октябрь*

## ОҚСАРОЙ

Қанча жаҳонгирлар изсиз йўқолди.  
Мозий барчасини бағрига олди.  
Нияти оқ экан Соҳибкироннинг,  
Ундан мангу ёдгор - Оқсарой қолди.

*2002 йил, 1 ноябрь*

## ЭПИГРАММА

У ҳамма-хамманинг теккан жонига,  
Заққум сингиб кетган бутқул қонига.  
Ундан ҳазар қилар хатто ажал ҳам.  
Чақирса кучук ҳам келмас ёнига.

*2002 йил, 12 ноябрь*

## ЁЛҒОН

Аввал ҳилол бўлиб кўринди Ёлғон,  
Сўнгра қулоч ёзди улкан ёйсимон.  
Роса кучга кириб тўлин ой бўлгач,  
Дунёни Ёлғон деб айлади эълон.

*2002 йил, 14 ноябрь*

## ЛАЙЛАГУЛ-ҚАДР

Қадр кечасида жами мусулмон  
Аллоҳ неъматига кўз тикар гирён.  
Ҳар йили бир бора юз берса ҳамки,  
Мен уни кутгайман ҳар тун нигорон.

*2002 йил, 2 декабрь*

## ЖУМБОҚ

Қадим донишмандлар демишлар бундок:  
– Уч одамнинг бири Хизр эрур, бок.  
Мен-ку ишонаман, Хизрдир бири.  
Қолган иккови ким? Буниси жумбоқ!

*2002 йил, 2 декабрь*

## СОВҒА

Шамол эсар эди тўхтамай кирдан,  
Одам ҳам учарди илдамрок нурдан.  
Сизга бир совғам бор дегандим, ажаб,  
Улар нккиси ҳам тўхтади бирдан!

*2002 йил, 4 декабрь*

## ИЛТИЖО

Дунёдан ўтаркан улуғ бир даҳо,  
Худога сўнги бор қилди илтижо:  
– Мендан сўнг номимни бирор зурёдим  
Пеш қилиб юрмаса дейман, Илоҳо!

*2002 йил, 20 декабрь*

## ТИЛАК

Танграм. ҳар банданга ўзинг қил шафқат,  
Жисмига қувват бер, руҳига рағбат.  
Ахир нималарни орзу қилмас у,  
Фақат эзгуликка йўл бергин, фақат.

*2002 йил, 31 декабрь*

## МЕХР

Майли, гўзалликка битайлик дoston,  
Майли, мухаббатга фидо бўлсин жон.  
Лекин жиндек меҳр кўргазса ёринг,  
Уларнинг баридан афзалдир, ишон!

*2003 йил, 6 январь*

## ДАЪВО

Бир шапалоқ урди гадони гадо,  
– Исмиим Худо, – деди, – қилабер даъво.  
Даъвогар қозига дод солиб борди:  
– Мени Худо урди, урди-ку Худо!

*2003 йил, 6 январь*

## ДУНЁ

Учрашди дунёнинг икки зўр пири,  
Уларни қийнарди дунёнинг сири.  
Бири йиғлаб дерди: – Уни тушундим,  
– Тушунмадим, – дея йиғларди бири.

*2003 йил, 10 январь*

## ПОСБОН

Ўғлим, ҳақ деганни қўллагил фақат,  
Парвоз қилар бўлса – осмони бўлгил.  
Ёвузликка қарши қудратинг кўрсат,  
Мудом эзгуликнинг посбони бўлгил.

*2003 йил, 14 январь*

## СЎҚМОҚ

Сўқмоққа беписанд боқма, эй ўғлон,  
Ажина йўли деб қилмагил гумон.  
Наинки шоқоллар ўтгайдир бундан,  
Арслон ҳам ўтгайдир гоҳи-гоҳи он.

*2002 йил, 16 ноябрь*

## ДИАЛЕКТИКА

Хар иш бир-бирига боғлиқ туюлгай,  
Агар ерни ўйсанг – тушроқ уюлгай.  
Сенинг ковоғингдан қор ёғса агар,  
Менинг кўзларимдан ёмғир қуюлгай.

*2003 йил, 20 январь*

### **КАРЗ**

Дилинга жойлаб ол ушбу каломни:  
Вақтида узиб қўй қарзу саломни.  
Токи, ажринг сўраб боланг бир умр  
Етаклаб юрмасин домла имомни.

*2003 ишл, 23 январь*

### **КАРОМАТ**

Кудукла сув азиз, тандирда-чи – нон,  
Тоғларнинг бисоти неча-неча кон.  
Бел боғлаб майдонга чикдингми, энди  
Сен ҳам бир каромат кўрсат, эй ўғлон!

*2003 йил, 24 январь*

### **БУЮКЛИК**

Тавоб қил, майлига, яхшилар изин,  
Лекин, ет кадрига буюклик сўзин.  
Кимнидир элу юрт бошга кўтаргай,  
Буюклар кўтаргай эл-юртнинг ўзин!

*2003 йил, 29 январь*

## ҲИКМАТ

Шундоқ хикмат билан гўзалдир ҳаёт:  
Хар кимга нияти бўлгайдир қанот.  
Меҳру муҳаббатга лойикдир асли –  
Меҳру муҳаббатни қадрлаган зот!

*2003 йил, 20 январь*

## ИСМ

Исмда нима айб,  
Бир аравақаш  
Болаларини йиғиб, койирди яккаш:  
Одам бўлмадинг-а, Шохжаҳон ўғлим,  
Комрон бекорчисан, Хумоюн сарқаш.

*2003 йил, 15 февраль*

## НУСХА

Кайси жойда кўрсатмасин қорасини,  
Бузоди у одамларнинг орасини.  
Қочгандан ҳам бир нимани юлиб олар.  
Қувгандан ҳам талаб қилар порасини.

*2003 йил, 15 февраль*

## **БИЗ**

Матлаб бир бўлмаса – жам бўлмагаймиз,  
Жам бўлсак – бошимиз ҳам бўлмагаймиз.  
Жам қилсак инсофу диёнатни ҳам,  
Дунёда ҳеч кимдан кам бўлмагаймиз.

*2003 йил, 17 февраль*

## **ШИКОЯТ**

Битта сўзинг билан дунёлар бунёд,  
Битта ишорангдан ҳаммаси барбод.  
Эътибор қилмадинг фақат Ўзингга,  
Сенга боғлиқ дил ҳам бўлмади обод.

*2003 йил, 2 март*

## **ПАСТНАЗАР**

Баланд бўлса ҳамки мартабанг магар,  
Сен элнинг наздида тубан, пастназар.  
Кўрсанг бир тангани, жондан ҳам кечиб,  
Пиёда кетгайсан Хиротга қадар.

*2003 йил, 2 март*

## АЁЛ

Кимдир бир юмушдан юзини бурди,  
Кимдир ваъда берди, ким хаёл сурди.  
Аёлни улуғлаш навбати етгач,  
Ҳамма «лаббай» дея ўрнидан турди.

*2003 йил, март*

## ОНА

Бир умр ахтардим самимиятни  
Ва уни оналар кўзида кўрдим.  
Учратай дегандим абадиятни,  
Уни ҳам онанинг ўзида кўрдим.

*2003 йил, март*

# ОЛДИНГИ ДАФТАРЛАРДАН

## ҚАЙРАҒОЧ

Ассалом, азизим, қайрағоч оға,  
Балки мен жиянман, сен менга тоға.

Фарқимиз биттадир: Сенинг тилинг йўк,  
Юрарга оёғинг, кетар йўлинг йўк.

Лекин бахтлидирсан, соя солурсан,  
Баҳра олганлардан дуо олурсан.

Тоғажон, менинг-чи, аҳволим мушкул,  
Мендан паноҳ топган қарғайди нукул,

Битта илтимос бор: ўрин алмашсак,  
Мен ҳам дарахт каби яшасам андак.

Сен-чи, бу дунёга инсон бўлиб боқ,  
Майли, бир кун мени ўтин қилиб ёқ.

1981

\* \* \*

Бирип-кетин ўтиб борар  
асрларнинг қарвонлари,

Оҳ, нечоғлик хатарлидир  
унинг ошар довонлари.

Илсон зоти муродига  
азал-абад етар эди,

Ушалса гар умидвор зот –  
Навойнинг армонлари!

Фурсат келди, дўсту ғаним  
кимлигини билай бу кун,

Жамъи башир фарзандига  
саодатлар тилай бу кун,

Кўкка боқиб саҳар чоғи,  
илтижолар қилай бу кун,

Нурга гўлсин азиз бобом  
Алишернинг маконлари.

*1991 йил, сентябрь*

## УРУМЧИДА БАҲОР

Урумчига нечун кечикдинг, баҳор.  
Нега чечакларинг кеч очилмоқда.  
Нечун чинорларинг ёзмайди виқор,  
Нечун боғлар атри кеч сочилмоқда.

Урумчи боғлари айлайди жавоб:  
Меҳмоним, бир сирга айланг эътибор.  
Энг улуғ манзилни этгали тавоб  
Пастдан юксакликка ўрлайди баҳор.

*1991 йил, Урумчи.*

## МУРАББИЙ

Қудлуғ айта билиш мумкинми Сизга,  
Тойилган чоғимда тутган эй Одам!  
Балки Акамдирсиз, балки Сиз Ўзга,  
Балки Сиз хайрихоҳ бутун бир олам.

Балки мўъжазгина меним ҳаётим  
Тушди бошингизга оқ тола бўлиб.  
Рози бўлур эдим бир умр токим –  
Шу ойдин шуълага кетсам йўғрилиб.

Мен ҳам англайдурман – Ҳаёт бу нима,  
Яхшилик, разолат, ўкинч ҳам савоб.  
Ҳайҳот, бу оламда камдир биргина  
Яхшилик аталган туйғу бир ноёб.

Сокин кўчаларда кезаман шодон,  
Хушбахтмен, билмайман кимдан? Ва нега?  
Оҳ, печоғ фараҳли экан бу осмон!  
Инсонмен, раҳматим айтурман Сенга...

1990

## МУНДАРИЖА

Шоир юраги .....	3
Ўзбекистон асри .....	5
Ўзбекман .....	7
Буюк китоб .....	8
Бир қарасам.....	9
«Дейдилар: –Чакнаган қайси юрт эрур...» .....	10
Озод республикам .....	11
Йўлтўсар .....	12
Икки шоир .....	13
Жазо топқусидир... ..	14
Ажрим .....	15
Олий неъмат .....	16
Гулливер .....	18
Надомат .....	19
Туш .....	20
«Стадион гувлайди...» .....	21
«Меъмор умр бўйи...» .....	22
Мен фақат... ..	23
Актёр .....	24
Йўқлов .....	25
Сирли олам .....	26
Ўтинч .....	28
Қадах .....	29
Наврўз .....	30
Хамма гап шунда... ..	31
Ватан учун яшайлик .....	32
Сахарлик .....	33
Жонибек .....	34
Огохлик .....	35
Ота ва бола .....	35

Сайёҳлар .....	36
Кумиқ билан суҳбат .....	37
Севишганлар .....	38
Ватаншош .....	39
Эътироф .....	40
«Муҳаббат ҳиссини...» .....	41
Бу йўллар .....	42
Ёзгин. дедилар .....	43
Термизим .....	44
Универсиада .....	45
Саъятим .....	46
Чала иморат .....	47
Яхши одам .....	48
Жаннат куши .....	49
Зиёрат .....	50
Илтижо .....	51
Осон эмас .....	52
Ривоят .....	53
Кўмсан .....	54
Тошкентим .....	55
«Тошкентим, Тошкентим...» .....	56
Ўн биринчи дур .....	57
Ғалати мантик .....	58
Бўлдило .....	60
Адолат кўзуси .....	61
Юпанч .....	62
Оллоҳнинг ишлари .....	63
Яхшилик .....	64
Томчи йиғилмаса жом ҳам тўлмайди .....	65
Олдинги дафтарлардан .....	105
Кайрағоч .....	105
«Бирин-кетин ўтиб борар...» .....	106
Урумчида баҳор .....	107
Мураббий .....	108

*Адабий-бадиий нашр*

**АБДУЛЛА ОРИПОВ**

**ШОИР ЮРАГИ**

*Тошкент «Маънавият» 2003*

**Мухаррир У. Қўчқор**

**Расом А. Мамажонов**

**Техн. муҳаррир Г. Золотилова**

**Мусаҳҳих С. Абдусаматова**

Теришга 26.02.2003 й.да берилди. Босишга 07.03.2003 й.да рухсат этилди. Бичими 70X90 Ч<sub>4</sub>. Таймс гарнитураси. Оффсет босма усулида босилди. Шартли б.т. 4.09. Шартли кр.-отт. 4.54. Нашр т. 2.46. 5000 нусха. Буюртма № К-9588. Нархи шартнома асосида.

«Маънавият» нашриёти. Тошкент, Буюк Турон, 41-уй. Шартнома 28-03.

Ўзбекистон Республикаси Матбуот ва ахборот агентлигининг Тошкент матбаа комбинатида чоп этилди. 700129. Тошкент, Навоий кўчаси, 30-уй. 2003.

**0-68**

**Орипов, Абдулла.**

**Шоир юраги: Шеърлар. –Т.: «Маънавият»,  
2003.–112 б.**

**ББК 84(5У)6-5**